



Sindikat Granične policije BiH

Синдикат Граничне полиције БиХ

Na sjednici Upravnog odbora koja je održana dana 30.01.2020. godine donešen je zaključak koji je vezan za učestale i neosnovane objave u pojedinim portalima, kao i posredne i neposredne pritiske na uže rukovodstvo Sindikata Granične policije BiH, kroz tendenciozne naslove i tekstove u određenim internet portalima i kroz podnošenje različitih prijava za povrede službene dužnosti.

S tim u vezi kao udruženje dužni smo svoje članstvo, a i javnost upoznati na aktivnost Sindikata. Naime, u pojedinim portalima više puta su objavljeni tekstovi koji sadrže neistine o aktivnostima Sindikata Granične policije BiH kojima je dezinformisana bh. javnost, u kojima se Sindikat GP BiH pominje u apsolutno negativnom kontekstu gdje su objavljene tendenciozne i neistinite činjenice. Nije nam jasan etički kodes novinarstva kod konstatnog neprofesionalnog odnosa jedne novinske agencije koja objavljuje neproverene informacije. Takvo pisanje nas može odvesti u sumnju ostvarivanja ličnih interesa, kroz medijski napad na Sindikat. Ovakvim natpisima se pokušava degradirati Sindikat GP BiH i njegov rad, te narušiti ugled i nanijeti direktna šteta kako Sindikatu tako i njegovim članovima.

Sindikat GP BiH samostalno i kroz Savez sindikata policijskih organa BiH, sa novim rukovodstvom, kao i rukovodstvom iz prethodnog mandata, se bori za prava svih zaposlenih u Graničnoj policiji BiH, o čemu svjedoči niz realizovanih i započetih aktivnosti na izmjeni i uređenju legislative u cilju poboljšanja radno-pravnog i socijalno-ekonomskog statusa pripadnika GPBiH, a posebno po pitanju načina odlaska policijskih službenika u penziju, načina utvrđivanja i obračuna njihove penzije, pitanju pribavljanja informacija u vezi novog načina utvrđivanja naknada na ime troškova prijevoza za dolazak na posao i odlazak sa posla za sve zaposlene u GP BiH, po pitanju uključivanja u postupak donošenja nove Metodologije za razvrstavanje državnih službenika i zaposlenika u platne razrede, pokretanja inicijative za zaključivanje Kolektivnog ugovora sa Poslodavcem, Vijećem ministara BiH, kolektivnog osiguranja za članove SGP BiH, socijalnim pitanjima (pružanjem novčanih pomoći, ispraćaja policijskih službenika u penziju, drugi vidovi davanja svojim članovima), konačno objavljivanje usvojenog novog pravilnika o uniformi u službenog glasniku, te druga pitanja koja su od interesa za članove SGP BiH.

Ne ponavljajući sve sporne konstatacije iz teksta, u svrhu davanja tačnih informacija za javnost, ukazujemo na sljedeće: Sindikat GPBiH samostalno od strane policijskih službenika GP BiH nikada nije zaprimio bilo kakvu informaciju, zahtjev, inicijativu niti je istaknut problem u vezi njihovog raspoređivanja i upućivanja na otkomandu u druge Jedinice GP BiH. S obzirom da problematika u vezi otkomande policijskih službenika GP BiH nikada nije delegirana od strane bilo kojeg policijskog službenika člana Sindikata, Sindikat GPBiH nije ni mogao inicirati rješavanje niti delegirati navedeni problem prema menadžmentu GP BiH. Sindikat GP BiH ima svoje organe (Skupštinu sindikata GP kao najveći organ unutar Sindikata, Upravni i nadzorni odbor), te na osnovu programa i planova koje donose ovi organi se zasniva rad Sindikata i njegovi ciljevi, te Sindikat kao takav nikad nije bio i neće biti društvo pojedinca već će kroz svoje programske ciljeve kako smo i naveli raditi na zaštiti radno-pravnog statusa svojih članova u skladu sa zakonskim i podzakonskim aktima.

Također, želimo istaći da se ovakvim pisanjem i prenošenjem neistinitih i neproverenih tvrdnji ne mogu riješiti problemi naših službenika. Novinska agencije koje su pisale članke u kojim se pominje Sindikata GP BiH nikada do sada se nije obratila rukovodstvu Sindikata GPBiH za provjeru dobijenih informacija, kao ni u cilju davanja medijske podrške rješavanju brojnih realnih problema naših službenika, te ovim putem pozivamo sve novinske agencije i portale da u saradnji kontinuirano medijski prezentiramo istinite podatke u cilju poboljšanja pravnih i ekonomskih uslova za adekvatnu cijenu rada, te ostvarivanja radnih i socijalnih prava službenika GPBiH.“

Sindikat granične policije BiH u narednom periodu, razmatra mogućnost zaštite svojih prava u smislu pokretanja pravne borbe protiv iznesenih lažnih optužbi na rad Sindikata Granične policije, da dokaže prije svega svom članstvu, a i javnosti da ovakve objave nanose štetu kako našem udruženju tako i instituciji čiji smo pripadnici.

SINDIKAT GRANIČNE POLICIJE BIH
UPRAVNI ODBOR